


## TORITENY - ALAHADY faha-31 TSOTRA - TAONA D



“Tonga amin’ity trano ity androany ny famonjena, satria zanak’i Abrahama koa ity lehilahy ity, fa ny hitady sy hamonjy ny very no nahatongavan’ny Zanak’olona”.

Ry Kristianina havana, mamarana ny volan'ny raozery isika amin'izao Alahady faha-31 mandavantaona izao, raha tamin'ny Alahady isika nandinika ny toe-panahy lehibe amin'ny maha mpivavaka, Kristianina mpanara-dia an'i Kristy atsika, tsy inona izay toe-panahy izay misongadina be dia be ao amin'i Masina Maria dia ny fanetren-tena. Io no hanampy atsika hiaina ny toe-panahy tena Kristianina fa tsy ho tahaka an'ilay Farisianina izay nirehareha satria nahavita zavatra.

Tsy ny fahavitana no zava-dehibe ary tsy ho mendrika na oviana na oviana amin'izay zavatra vita isika fa ny finoana ny fahasoavan'Andriamanitra no hahafahantsika mihavao sy mihatsara ka

manatanteraka ny sitrapon'Andriamanitra tahaka an'i Masina Maria. Izany indrindra amin'izao Alahady izao no tian'ny Eglizy ho fantantsika satria manomana ny volana novambra isika izay handinihina bebe kokoa ny fiainan-koavy izay mitondra atsika amin'ny fankalazana an'i Krisy mpanjaka. Ny hoe hoavy dia tsy ny fiafaran'izao rehetra izao, marina tsy maintsy misy ny fiafarana, fa ny ao amin'i

**Vakiteny I :** Fah. 11, 23 — 12, 2

**Salamo :** Sal. 144

**Vakiteny II :** 2 Tes. 1, 11 - 2, 2

**Evanjely :** Lk. 19, 1-10

Kristy dia izy no manjaka amin'izao rehetra izao. Tsy tokony hatahotra isika fa mitondra fanantenana ho antsika izany. Izay no mahatonga i Md Paoly norenesintsika tamin'ny Alahady farany teo nilaza : "Mihazakazaka amin'ny ady farany aho", io no ampatsiahivin'ny Eglizy amintsika raha mibanjina ny fiainan-koavy isika, raha mankalaza an'i Kristy Mpanjaka ary dia anatin'izany rahateo no amaranantsika sy anentanana antsika matetika fa mamarana ny taona masina famindrampo isika.

Masina ny taonan'ny famindrampo, tsy hoe mamarana isika, tsy izay fankalazana izay no tanjona na ny tadiavin'ny Papa Ray masina raha nametraka an'izao taona masina izao izy fa hahatonga atsika fa hiroso amin'ny lalindalina kokoa mba ho mpamafy ny fanantenana isika, mba ho misioneran'ny famindrampo. Izany no nahatonga atsika teto amin'ny diosezy niaraka tamin'ireo tsaiky madiniky jiaby satria izy ireo no fanentanantsika sy ny hoavintsika mba ho mpamafy ny famindrampo manomboka dieny izao. Tsy tanjona ary ny fankalazana ny taona masina famindrampo fa firosoana amin'ny lalindalina kokoa. Ezaka tsy maintsy ataontsika eto amin'ny diosezy ihany koa izay mba ho mpamafy famindrampo isika, handray an-tànana bebe kokoa ny Eglizintsika mba ho Eglizy velona sy Eglizy olo isika araka ny fomba filazantsika azy.

Izay indrindra no tian'ireo vakiteny aroso amintsika amin'izao Alahady faha-31 mandavantaona izao no sady amaranantsika ny volan'ny raozery izay niarahantsika nivavaka niaraka tamin'i Masina Maria fa indrindra ny Evanjely mitantara an'i Zake. Tahaka an'i Zake io isika tsirairay avy, maro ny zavatra tsy mety eo amin'ny fiainantsika, mifanenjika isika, fantantsika fa i Zake dia voan'ny tondro molotra avy amin'ireo manodidina azy; poblikana izy ary mpamory hetra izany hoe manangona ny harenan'ny olona. Tsy ny hoe mpamory hetra no ratsy fa ilay fanangonana harena, tsy nanao ny rariny izy ary fantany izany, tsapan'i Zake tokoa fa tena kely izy, kely rahateo ny vatany dia nieritreritra izy fa hisondrotra bebe kokoa hahita an'i Jesoa.

Ampianaran'i Jesoa isika androany fa tsy ny fisondrotantsika hihazakazaka hitady an'izao rehetra izao na hiakatra any ambony no tadiaviny fa isika hidina sy hiditra bebe kokoa amin'ny fiainantsika izay midika hoe fampitrahofana ny finoana sy ny fiainana andavanandro, hiantrano amintsika i Jesoa. Tsy isika no hampisondrotra ny eritrerintsika handeha any amin'ny volana na amin'ny habakabaka fa i Jesoa no nidina tety amintsika tamin'ny fahatongavany ho nofo ka isika koa tsy maintsy manetry tena, miaiky ny heloka vitantsika, manaiky fa mpanota isika, izay no nataon'i Zake izay milaza amintsika tsirairay avy ary amin'izao famaranana ny volana oktobra izao tahaka nataon'i Masina Maria namangy an'i Elizabeta, mamangy atsika tokoa i Jesoa.

Niera-nientana izy mirahavavy, niara-nientana i Joany sy Jesoa mbola samy tao ambohoka.

Aoka hiaraka hientana isika ry Kristianina havana fa miteny aminao androany i Jesoa hiantrano ao aminao. Dia anjarantsika tahaka an'i Zake ny handray azy fa hitondra fahasoavana amintsika i Jesoa raha mampiditra azy isika. Mitovy amin'ny fandraisantsika ny kominio izany, asa raha tsapantsika fa isaky ny mandray ny kominio isika dia mandray an'i Jesoa, miantrano amintsika i Jesoa. Ary ny tena mampieritreritra lalina dia i Jesoa no manetry tena, dia izy no milaza amintsika fa hiantrano ao aminao ao : fanetren-tena lehibe ataon'Andriamanitra izay ry Kristianina havana.

Milaza aminao izay mamaky an'izao toriteny izao izy, milaza aminao “hiantrano aminao aho”.

Anjarantsika ary tahaka nataon'i Zake no mampiantrano azy dia hiova ny fiainantsika.

Ny miantrano dia midika fa ao anatintsika ao izy sady feno fanetren-tena. Niova ny fon'i Zake ka tamim-panentretena tokoa no nanolorany ny fananany ka nilazany tamin'i Jesoa hoe : indro ny antsasaky ny fananako. Fahafaoizana ny vokatry ny fandraisana an'i Jesoa.

Betsaka ny manontany amiko hoe : ahoana no hahafantarana fa efa ato amiko ny finoana izany hoe i Jesoa efa niantrano antsika ?

Isika mahafoy no fahafantarana fa miantrano amintsika i Jesoa : manana “disponibilité”.

Rehefa mahafoy isika dia betsaka ny milaza fa adala isika, i Jesoa mananatra atsika milaza “Efa tonga amin'ity trano ity androany ny famonjena satria zanak'i Abrahama izy, mitady sy hamonjy ny very ny hahatongavan'ny zanak'olona” .

Izany tokoa ry Kristianina havana ary izay ny vaovao mahafaly sy ny fanantenantsika, izay no torintsika amin'ny fiainantsika vokatry ny fahafaoizana tahaka ny nataon'i Zake, tahaka nataon'i Jesoa nahafoy ny maha Andriamanitra azy mba hamonjy atsika. Tsy maintsy mifamonjy ary isika, tsy maintsy mifanasoa isika izay ny vokatry ny finoana iainantsika, izay no mahatonga an'i Md Paoly ao

amin'ny vakiteny faharoa taratasy ho an'ny Tesalonisiana midera sy manome voninahitra an'Andriamanitra satria ny Tesalonisiana dia nandray an'i Jesoa.

Izany koa no isaorako atsika mianakavy, fantako fa mandray an'i Jesoa isika ka aoka hanana an'izay fahafoizana izay, hanana faharetana, hanana ny fanetren-tena, ny fitiavam-bavaka araka ny fampianarana atsika amin'ilay ratsan-tànana dimy. Io ny hafantarana fa mandray an'i Jesoa isika ka hamporisihina atsika hiroso amin'ny lalindalina kokoa fa raha mampiantrano an'Andriamanitra isika dia avelan'Andriamanitra izay tsy mety eo amintsika ary dia avaoziny ho olom-baovao tokoa isika araky ny hitantsika ambaran'ny bokin'ny fahendrena ao amin'ny vakiteny voalohany ka hahasoa, hahatsara atsika ary amin'izay mitoetra eo anivontsika tokoa ny fanahin'Andriamanitra. Tsy hoe famaizana ny ataon'Andriamanitra amintsika fa fahasovana ary dia maniraka atsika hifanasoa eo anivon'ny mpiara-belona amintsika.

Ry Jesoa Tompo ô, miantrano aminay tokoa ianao tahaka ny niantranoanao tao amin'i Zake, ka nahatonga azy nihavao tanteraka ary nanana ny fahafoizana, faharetana, fanetren-tena ary fahasahiana hiroso amin'ny lalindalina kokoa ary nanana ny fitivam-bavaka. Io ilay ratsan-tànana dimy vokatry ny fihavaozana nentinao eo anivonay raha miantrano aminay ianao. Enga anie izahay ry Jesoa Tompo hahafoy, hanana fanetren-tena, hanana faharetana sy fitiavam-bavaka eo amin'ny fanompoana anao sy ny fanompoana ny namana amin'ny alalan'ny asa fanasoavana isankarazany ka haka tahaka an'i Masina Maria reninay izay niara-dàlana taminay tokoa nandritra an'izao volan'ny Raozery izao ary izy hiaraka aminay mandrakariva amin'ny fanatanterahana ny sitraponao ary raha manatanteraka an'izany izahay dia miombona amin'ny olona masina rehetra izay ankalazainay amin'ny voalohany volana novambra ary hivavahanay ihany koa an'ireo nialoha làlana anay. Amen

Mompera Arseveka Mgr Benjamin Ramaroson